

Plenchi

Bèl a bati

Bèlèm bèlèm....TRINGG TRINGGG bèlèm..... TRINGG TRINGGG bèlèm.....

Un felis wikènt pa bo i bon bini riba plenchi. Dianan ta kue un spit aki den fin di aña. Nos a drenta desèmber i ta manera ta mas duru e spit ta. Ta solamente 2 plenchi mas nos tin pa e aña aki. Despues nos tur ta tuma un pouza pa nos subi otro plenchinan durante di dianan di fiesta. Pero no preokupá nos tei bèk den yanuari. E di dos siman di yanuari nos lo wardabu riba nos plenchi. Nos plenchi ta kontentu di topabu awe atrobe. Sinta i relahá i disfrutá di loke nos tin di kompartí ku bo riba nos plenchi.

Un siman bendishoná pa bo.

Riba roster

Regina Pacis na bloedbank.

Klas ZW32 di Regina Pacis a bishitá bloedbank pa haña informashon tokante nan servisionan. Asina nan sa kiko ta Banko di Sanger i su balor pa komunidat. Nos futuro dunadónan di sanger. Nos ta spera ku mas skol ta sigui e ehèmpel di Regina Pacis.







Not'é riba bòrchi

Kolegio Nechi Pieters su siman de lesa.

Kolegio Nechi Pieters tabatin bishita di tanchi Merly Augusta, tanchi Loekie Morales i tio Chris ku a bin lesa ku muchanan na skol. Muchanan a gosa un bòl. Kòrda ku lesa buki ta mas dushi ku kuki. Riba e potrètnan por mira e ambiente na skol.



Den agènda

Fakansi di skol:

21 desèmber te ku 3 yanuari.

Selebrashon

Selebrashon hubilarionan di RK i brindis di aña nobo 11 di yanuari

Riba rapòrt

St. Franciscus College ku bunita logro. Den fin di siman diferente skol a partisipá na e kues di Tur ta konta. Tres skol a bai finale, Johan van Walbeeck school, Römerschool i st. Franciscus College. Pabien na tur ku a partisipá pero speshalmente na e skolnan ku a pasa pa finale. Un danki di kurason na tur e motornan tras di Tur ta konta pa nan trabou balioso pa nos muchanan.



Mi ta konta

Trevor tabata hari su barika yen den outo pa tur e kos di prètman ku Quiton, su ruman chikí, tabata papia. Nan tabata den outo na kaminda pa bai landa na Kenepa Chiki. Nan tabata ansioso pa yega laman pa nan por usa nan boto di supla i pa nan por subi e flinan ku nan mes a traha siman pasá.

Diripiente Papa a lastra un brèk i e outo a para. Trevor a tende su tata ta bisa ku stèm temblá: “Oh mi Dios, ma dal’è.” Daniel a spanta i a puntra: “Ken Papa, ken papa a dal?”

Mesora Papa a rospondé: “No preokupá dushinan, nada no a pasa.”

Papa a sigui kore i Mama a hisa e radio duru mientras Despacito tabata toka. “Ban kanta huntu ku mi.” Mama a kuminsá kanta duru. Pero Trevor a bira wak patras i a mira un konènchi morto riba kaya. Mesora Trevor a grita:”Para e outo Papa, please para e outo.” Papa: “Pakiko Trevor, nos tin ku yega laman na tempu.”

“No, Papa e konènchi ta heridá nos mester hibe dòkter.” Mama a trankilisá Trevor bisando: “Ta djis un bestia mi yu, nada no a pasa.” Trevor a kuminsá yora: “Por favor, para, para.” Quinton tambe a kuminsá yora i a keda roga e tata pa e para. E muchanan tabata asina tristu ku Papa a disidí di para e outo, realisando ku el a hasi un fout grandi. El a bira e outo bèk i nan a kue e konènchi hinka den outo pa bai dòkter.

Djis un ratu nan a kore, ku nan a topa un polis ku a para tur outo. Un outo a bòltu riba kaya i niun outo por a pasa ni bai ni bin.

Mesora Papa a pidi tur e otro personanan den e outonan den fila pa nan yuda pa hisa e outo i pone na kantu. Tur hende a duna un man, asina kaminda a habri i tur hende por a sigui nan rumbo.

Ora nan a yega na dòkter di bestia, mesora dòkter a wak ku e konènchi su pia a kibra. Mesora dòkter a spalk e pia. Trevor i Quinton a pidi Papa si nan por bai kas ku e konenchi pa kuid’è te ora e bira bon.

Asina a sosodé, ku 4 siman despues nan a bai huntu pa pone e konènchi bèk den un mòndi banda di e kaya kaminda e aksidente a tuma lugá. Ku hopi fèdrit Trevor i Quinton a laga e kònènchi bai, paso nan a gusta masha ku ne. Pero nan tabata sa ku e bestia ta mas felis den naturalesa.

Mucha djispou

Jairo: “Papi mi no ke bai skol awe.”

Papa: “Dikon mi yu?”

Jairo: “Paso mi ta sintu malu”

Papa: “Dikon mi yu, kiko bo ta sinti?”

Jairo: “Mi ta sinti malu, asina mi pensa ku mi tin ku bai skol.”

Papa: “Pesey stòp di pensa i djis pura pa nos yega.”